
ORDENANZA MUNICIPAL DE PREVENCIÓN DE INCENDIOS FORESTAIS

Contido

Contido.....	1
EXPOSICIÓN DE MOTIVOS.....	1
TÍTULO I.- DISPOSICIÓN XERAIS.....	2
TÍTULO II.- FUNDAMENTOS LEGAIS.....	3
TÍTULO III.- XESTIÓN DA BIOMASA VEXETAL.....	5
TÍTULO IV.- PROCEDEMENTO DE ORDE DE EXECUCIÓN DE XESTIÓN DE BIOMASA VEXETAL.....	8
TÍTULO V.- PLANTACIÓNS.....	11
TÍTULO VI.- INFRACCIÓNS, SANCIÓNS E PROCEDEMENTO SANCIONADOR.....	12
Disposición Transitoria.....	15
Disposición Derrogatoria.....	15
Disposición derradeira.....	15
ANEXO I: Especies pirófitas.....	16
ANEXO II: Especies frondosas.....	17
ANEXO III: Modelo de comunicación previa para cortas de arborado en solo urbano e de núcleo rural.....	18
ANEXO IV: Tarifas para liquidación provisional da execución subsidiaria.....	19

EXPOSICIÓN DE MOTIVOS

O *Plan de Desenvolvemento Rural de Galicia 2014-2020* reconece aos incendios forestais coma un dos máis importantes problemas ambientais de Galicia, constituíndo unha grave causa de perdas de riqueza nas economías rurais, un risco severo para as persoas e os ecosistemas e unha fonte inesgotable de gasto público. Por todo o anterior, cómpre desenvolver políticas activas de prevención e loita contra incendios forestais que permitan protexer de xeito efectivo os recursos naturais e humanos do territorio dos riscos asociados ó lume.

Neste senso, a aprobación da *Lei 3/2007, do 9 de abril, de prevención e defensa contra os incendios forestais de Galicia*, implicou a implantación de novas estratexias de prevención de incendios forestais que perseguían cumprir con estes obxectivos. Porén, as novas medidas de prevención de incendios establecidas pola Lei supuxeron a adquisición de novas responsabilidades por parte de tódolos axentes sociais relacionados directa ou indirectamente co medio rural e forestal.

No que concirne ás responsabilidades dos concellos, o artigo 16 da *Lei 3/2007* establece un conxunto de normas e consideracións técnicas que o concello das Neves incorporou á súa planificación por medio da aprobación do Plan de Prevención e Defensa contra Incendios Forestais Municipal. Porén, algúns aspectos esenciais da prevención de incendios forestais a escala municipal non foron explicitamente determinados na *Lei 3/2007*, polo que deben ser concretados por medio da aprobación dunha ordenanza municipal específica.

Conforme á potestade atribuída polos artigos 4 da *Lei 7/1985, de 2 de abril, Reguladora do Réxime Local* e 6 da *Lei 5/1997, do 22 de xullo, reguladora da Administración Local de Galicia*, coa presente Ordenanza o Concello das Neves propónse desenvolver a regulación da xestión da biomasa vexetal e das distancias de plantación de especies arbóreas e arbustivas, no solo urbano, de núcleo rural e urbanizable delimitado, así como o deseño do procedemento administrativo de orde de execución de xestión de biomasa vexetal, no ámbito das súas competencias, co obxecto de conseguir as axeitadas condicións de seguridade para reducir os riscos asociados ós incendios forestais, protexendo dos mesmos ás persoas, ás poboacións, ás infraestruturas e ós ecosistemas.

TÍTULO I.- DISPOSICIÓNS XERAIS.

ARTIGO 1.- Obxecto

O obxecto da presente Ordenanza é a regulación da xestión da biomasa vexetal no territorio municipal do Concello das Neves e dentro do seu ámbito competencial, nos termos definidos na *Lei 3/2007, de prevención e defensa contra incendios forestais de Galicia*.

ARTIGO 2.- Ámbito de aplicación

En consonancia co establecido no artigo 4.2 da *Lei 5/1997, de 22 de xullo, reguladora da Administración local de Galicia*, o disposto na presente Ordenanza aplicarase naqueles ámbitos que non estean explicitamente regulados na lexislación básica en materia de prevención e defensa contra incendios forestais.

Concretamente, será de aplicación en toda superficie municipal situada no interior de núcleos de poboación (solo de núcleo rural, urbano e urbanizable delimitado), así como naqueles terreos forestais ou de influencia forestal (situados a menos de 400 metros de terreos forestais) que se atopen a menos de 50 metros de núcleos de poboación e de edificacións ou instalacións illadas, segundo establece o artigo 21 da *Lei 3/2007, de prevención e defensa contra incendios forestais de Galicia*.

ARTIGO 3.- Definicións

Solo urbano: Terreos que a planificación urbanística (*Plan Xeral de Ordenación Municipal, PXOM, 1999*) do concello tivera definido e clasificado como tal en virtude do disposto na lexislación urbanística (vixente no momento de aprobación do PXOM: artigo 11 da *Lei 1/1997, de 24 de marzo, do Solo de Galicia*).

Núcleos rurais: Terreos que se incluían dentro dos núcleos rurais delimitados na planificación urbanística municipal (*Plan Xeral de Ordenación Municipal*, PXOM, 1999), de conformidade co disposto na lexislación urbanística (vixente no momento de aprobación do PXOM: artigo 13 da *Lei 1/1997, de 24 de marzo, do Solo de Galicia*).

Solo urbanizable delimitado: Terreos que non tendo a condición de solo urbano, de núcleo rural nin de solo rústico a planificación urbanística (*Plan Xeral de Ordenación Municipal*, PXOM, 1999) tivese definido e clasificado como tal ao poder ser obxecto de transformación urbanística nos termos fixados na lexislación urbanística (vixente no momento de aprobación do PXOM: artigo 12 da *Lei 1/1997, de 24 de marzo, do Solo de Galicia*).

Xestión da biomasa vexetal: Eliminación parcial ou total da biomasa vexetal por medio do emprego das técnicas máis eficaces, con mínimo impacto ambiental (preferiblemente mecánicas) e coa intensidade e frecuencia necesarias para xerar nivel descontinuidades horizontais e verticais dos combustibles que garantan o cumprimento das condicións mínimas de seguridade e salubridade legalmente esixibles así como a conservación dos valores naturais.

Persoas responsables: persoas titulares dos terreos, ou no seu caso usufrutuarios do dereito de aproveitamento sobre os terreos, urbanos, urbanizables delimitados e de núcleo rural, así como as persoas, administracións, entidades ou sociedades que poidan considerarse responsables aos efectos do establecido no artigo 21 ter da *Lei 3/2007, de prevención e defensa contra incendios forestais de Galicia*.

Terreo forestal: Terreo que cumpre con algún dos criterios especificados no artigo 2 da *Lei 7/2012, de 28 de junio, de montes de Galicia*.

Zonas de influencia forestal: Áreas estremeiras que abarcan una franxa circundante dos terreos forestais cunha anchura de 400 metros, excluindo o solo urbano, de núcleo rural e o urbanizable delimitado.

Especies pirófitas: Especies consideradas xeradoras ou potenciadoras dos riscos vencellados ós incendios forestais e que están incluídas na disposición adicional terceira da *Lei 3/2007, de prevención e defensa contra incendios forestais de Galicia* (Anexo I da presente Ordenanza).

Especies frondosas: Especies arbóreas autóctonas incluídas no Anexo 1 da *Lei 7/2012, de 28 de xuño, de Montes de Galicia* (Anexo II da presente Ordenanza).

TÍTULO II.- FUNDAMENTOS LEGAIS

ARTIGO 1.- Fundamentos legais.

Descríbense brevemente a continuación as normas vixentes de maior relevancia en relación coa prevención de incendios forestais e coas distancias de plantación de árbores:

1. Artigos 582, 591 e 592 do Código Civil:

- Establecen as distancias mínimas que debe haber entre árbores ou arbustos e as propiedades estremeiras, así como as condición baixo as cales poderase ordenar ou

executar a poda de ramas ou raíces que invadan unha propiedade estremeira.

2. *Decreto 2661/1967, de 19 de outubro, sobre distancias entre plantacións e fincas estremeiras.*

- Define as distancias mínimas que deberán respectar as novas repoboacións forestais con cultivos agrícolas estremeiros, en función da especie forestal a plantar.

3. *Decreto 81/1989, de 11 de maio, sobre medidas de ordenación das novas plantacións co xénero Eucaliptus.*

- Complementa o establecido no *Decreto 2661/1967* con respecto ás distancias mínimas que deberán respectar as novas repoboacións forestais de eucaliptos con fincas estremeiras.

4. *Lei 43/2003, de 21 de novembro, de Montes.*

- Establece algunhas consideracións xerais acerca das responsabilidades das persoas e das administracións na prevención de incendios forestais, o réxime sancionador relacionado cos incendios forestais, entre outros aspectos.

5. *Lei 7/2012, de 28 de xuño, de Montes de Galicia.*

- Modifica gran parte do disposto na *Lei 3/2007* e establece as distancias mínimas a respectar polas novas repoboacións forestais.

6. *Decreto 105/2006 de 22 de xuño, polo que se regulan as medidas relativas á prevención de incendios forestais, á protección dos asentamentos no medio rural e á regulación de aproveitamentos e repoboacións forestais.*

- Establece por primeira vez na lexislación galega un conxunto de consideracións e limitacións normativas en relación coa prevención de incendios forestais.

7. *Lei 3/2007 de 9 de abril, de prevención e defensa contra incendios forestais de Galicia.*

- Define as redes secundarias de faixas de xestión de biomasa vexetal, as responsabilidades das persoas titulares de terreos no cumprimento da xestión de biomasa vexetal, así como as responsabilidades dos concellos na planificación da prevención de incendios forestais e na instrución dos procedementos necesarios para facer efectiva a xestión da biomasa vexetal, entre outros aspectos.

8. *Orde de 18 de abril de 2007 pola que se zonifica o territorio con base no risco espacial de incendio forestal.*

- Determina os concellos que son considerados como Zona de Alto Risco de Incendio, entre os cales se inclúe o Concello das Neves.

9. *Orde do 31 de xullo de 2007 pola que se establecen os criterios para a xestión da biomasa vexetal.*

- Establece as condicións mínimas legalmente esixibles co a que se debe xestionar a biomasa vexetal por parte das persoas responsables nas zonas definidas na *Lei 3/2007*.

10. *Lei 39/2015, de 1 de outubro, de Procedemento Administrativo Común das Administracións Públicas.*

- Dispón as características que debe cumprir o procedemento administrativo de orde de execución de xestión de biomasa vexetal.
11. *Lei 2/2016, de 10 de febreiro, do Solo de Galicia.*
- Define no seu artigo 135 as obrigas das persoas titulares de terreos de mantelos nunhas condicións mínimas de seguridade, salubridade, accesibilidade universal e ornato público.
12. *Decreto 143/2016, de 22 de setembro, polo que se aproba o Regulamento da Lei 2/2016, do 10 de febreiro, do solo de Galicia.*
- Complementa, no seu artigo 332, o disposto na Lei 2/2016, no que concirne ás responsabilidades dos titulares de terreos.
13. *Lei 9/2017, de 26 de decembro, de medidas fiscais e administrativas.*
- Introduce modificacións á Lei 3/2007 no referente ás características das redes de faixas de xestión de biomasa vexetal e do procedemento para a xestión da biomasa vexetal.
14. *Instrución 1/2018, do 26 de abril, relativa ás actuacións administrativas en materia de cumprimento das obrigas de xestión da biomasa vexetal e retirada de especies arbóreas impostas pola Lei 3/2007, do 9 de abril, de prevención e defensa contra os incendios forestais de Galicia, a Lei 6/2011, do 13 de outubro, de mobilidade de terras, e a Lei 7/2012, do 28 de xuño, de montes de Galicia.*
- Desenvolve en profundidade as características do procedemento de orde de execución de xestión da biomasa a vexetal a instruír polo concello e dos procedementos sancionadores vencellados.

TÍTULO III.- XESTIÓN DA BIOMASA VEXETAL

Sección 1ª Xestión da biomasa vexetal no interior dos núcleos de poboación

ARTIGO 1.- Obrigas de xestión de biomasa vexetal

As persoas responsables, segundo o establecido no artigo 3 da presente Ordenanza, de terreos situados en solo urbano, urbanizable delimitado, ou de núcleo rural deberán xestionar a biomasa vexetal das súas fincas antes do 30 de maio de cada ano.

ARTIGO 2.- Criterios de xestión da biomasa vexetal

1. A xestión da biomasa vexetal por parte das persoas responsables deberá executarse conforme ós seguintes criterios:

- a) En solo urbano, urbanizable delimitado, ou de núcleo rural non poderán existir exemplares de especies pirófitas, de acordo coa definición establecida no artigo 3 desta Ordenanza, salvo que o correspondente informe técnico acredite que os exemplares posúen un especial valor natural ou ornamental ou que, por atoparse illados, non constitúen un risco significativo en relación coa propagación de incendios forestais.

- b) No estrato arbóreo, as masas estarán formadas por especies non consideradas pirófitas, de acordo coa definición establecida no artigo 3 desta Ordenanza. Os exemplares deberán estar distanciados entre si como mínimo 7 metros e deberán estar debidamente podados no terzo inferior da súa altura ata un máximo de 4 metros, salvo que, polo debidamente xustifico valor natural ou ornamental dos mesmos, o correspondente informe técnico desaconselle a execución destas medidas.
- c) As árbores deberán atoparse a unha distancia mínima de 2 metros coas antas de parcelas estremeiras, medida en horizontal dende o tronco, a unha altura de 1,3 m.
- d) Nos estratos herbáceo e arbustivo, realizaranse rozas para garantir o cumprimento do disposto no apartado b) do artigo 2 *da Orde do 31 de xullo de 2007 pola que se establecen os criterios para a xestión da biomasa vexetal* e en ningún caso estes estratos poderán superar unha altura de 1 metro. As rozas serán realizadas a feito por medios mecánicos, salvo que o correspondente informe técnico, tras determinar a presenza de exemplares de especial valor natural ou ornamental, recomende a execución de rozas selectivas ou por medios manuais.
- e) No caso de terreos nos que existan edificacións en estado ruinoso ou de abandono, realizaranse as actuacións de xestión de biomasa vexetal necesarias para garantir a accesibilidade á propiedade, evitando en todo caso que a vexetación medre de xeito que comprometa a estabilidade estrutural da edificación.
- f) Os criterios anteriores non serán de aplicación no caso de parques, xardíns ou espazos verdes de titularidade pública.

Sección 2ª Limitacións técnicas e normativas á xestión da biomasa vexetal

ARTIGO 3.- Réxime de autorizacións para cortas de arborado no interior dos núcleos de poboación

1. A corta de calquera exemplar arbóreo en solo urbano, de núcleo rural requirirá da presentación no rexistro do Concello dunha comunicación previa (modelo do Anexo III) cunha antelación de 15 días á execución da corta.
2. A corta de calquera exemplar arbóreo que existira en solo urbanizable delimitado antes da entrada en vigor da *Lei 7/2012 de montes de Galicia* requirirá da correspondente solicitude de autorización á Xunta de Galicia, segundo o establece a disposición transitoria quinta da devandita Lei.
3. Naqueles casos nos que, conforme ó disposto no artigo 6 desta Ordenanza, sexa preceptiva a corta de exemplares arbóreos para o cumprimento das obrigas de xestión de biomasa vexetal, a persoa responsable non estará exenta do réxime de autorizacións establecido neste artigo.

ARTIGO 4.- Biomasa vexetal residual

En cumprimento do establecido no artigo 95 da *Lei 7/2012 de montes de Galicia*, tras a realización das rozas ou cortas que resulten preceptivas en cumprimento das obrigas de xestión de biomasa vexetal deberá executarse adicionalmente una trituración de restos *in situ*, agás no caso dos elementos leñosos de diámetro maior de 5 centímetros, que deberán ser retirados da parcela, salvo que o correspondente informe técnico prescriba expresamente o contrario.

ARTIGO 5.- Afeccións á xestión da biomasa vexetal

1. Como norma xeral, no caso de que a execución de actuacións de xestión da biomasa vexetal estea condicionada por limitacións normativas establecidas por lexislacións sectoriais vixentes ou mesmo suxeita a un réxime de autorizacións, estas limitacións xunto coa necesidade de autorización deberán ser analizadas e incluídas no correspondente informe técnico.

2. Se como conclusión do correspondente informe técnico despréndese a necesidade de solicitar autorización a unha determinada Administración sectorial para executar a xestión da biomasa vexetal, a persoa responsable de dita execución, conforme o disposto no artigo 3 desta Ordenanza, será a única responsable de facer efectiva dita solicitude.

ARTIGO 6.- Tipos de afeccións á xestión da biomasa vexetal

A xestión da biomasa vexetal nos espazos que constitúen o ámbito desta Ordenanza poderá verse legalmente condicionada polos seguintes tipos de afeccións:

1. Recursos hídricos: Sempre que a execución da xestión da biomasa vexetal afecte a ou sexa realizada nas inmediacións de canles catalogadas pola Confederación Hidrográfica Miño-Sil, analizarase a necesidade de solicitar autorización ó Organismo de Conca, o que deberá reflectirse no correspondente informe técnico. Como norma xeral, nas zonas de servidume dos cursos fluviais, nunha franxa de 5 metros dende o límite da canle, non se procederá á xestión da biomasa vexetal, salvo que así o autorice expresamente o Organismo de Conca.

Nas zonas de policía dos cursos fluviais, nunha franxa de 100 metros dende o límite da canle, aplicaranse na medida do posible métodos selectivos de control da vexetación, resultando preceptiva a solicitude de autorización ó Organismo de Conca no caso de que as actuacións de xestión de biomasa vexetal afecten significativamente a especies non consideradas pirófitas, de acordo co establecido no artigo 3 desta Ordenanza.

2. Conservación de hábitats e especies: En ningún caso se procederá á xestión da biomasa en hábitats identificados como prioritarios no Anexo I da Directiva Hábitats (Directiva 92/43/CEE *do Consello, do 21 de maio*). No suposto de que o correspondente informe técnico ditamine que as actuacións de xestión de biomasa vexetal poden afectar directa ou indirectamente a especies de flora ou fauna protexidas, deberá solicitarse autorización á Administración competente en materia de conservación da natureza antes de executar as devanditas actuacións.

3. Procesos erosivos: En cumprimento da obriga establecida no artigo 44.2 d) da *Lei 7/2012, de montes de Galicia*, en zonas de elevadas pendentes, de solos fráxiles ou nas que existen evidencias de que se dan ou se poden dar procesos erosivos significativos, poderá proporse unha redución da intensidade da xestión da biomasa coa fin de protexer os solos, se así o establece o correspondente informe técnico, que deberá contar co informe favorable da Administración forestal competente.

4. Patrimonio Cultural: Conforme ó disposto na *INSTRUCCIÓN de 8 de novembro de 2017 relativa al trámite de autorizaciones en materia de patrimonio cultural en los bienes inmuebles catalogados y declarados de interés cultural, sus contornos de protección y las zonas de amortiguación*, sempre que se realicen actuacións de xestión de biomasa vexetal nas inmediacións de bens catalogados do Patrimonio Cultural pedirase autorización á Administración autonómica competente, salvo que se trate de podas ou rozas por medios manuais ou mecanizados portátiles. Nos contornos de protección dos bens catalogados non será preciso solicitar autorización mentres as actuacións propostas non modifiquen significativamente a escena urbana ou a paisaxe natural na que se atopan.

TÍTULO IV.- PROCEDIMIENTO DE ORDE DE EXECUCIÓN DE XESTIÓN DE BIOMASA VEXETAL

ARTIGO 1.- Publicación de información

O Concello das Neves publicará anualmente na súa páxina *web* unha cartografía das redes secundarias de faixas de xestión de biomasa vexetal definidas no plan de prevención e defensa contra incendios municipal, xunto cun listado onde se relacionen as referencias catastrais das parcelas afectadas polas franxas definidas no artigo 21 da *Lei 3/2007*.

ARTIGO 2.- Procedemento de orde de execución de xestión de biomasa vexetal

1. As persoas físicas ou xurídicas responsables, segundo o disposto no artigo 21.2 da *Lei 3/2007*, deberán executar a xestión da biomasa vexetal nos seus terreos de acordo co establecido na *Orde do 31 de xullo de 2007 pola que se establecen os criterios de xestión da biomasa vexetal* ou, no seu caso, no artigo 6 desta Ordenanza antes do 30 de maio de cada ano.

2. Transcorrida esta data sen que os responsables executaran as actuacións pertinentes de xestión de biomasa vexetal, o Concello poderá dar inicio á instrución do procedemento de orde de execución de xestión de biomasa vexetal.

ARTIGO 3.- Inicio do procedemento de orde de execución de xestión de biomasa vexetal

1. Transcorrido o 30 de maio de cada ano, os servizos técnicos municipais, así como calquera cidadán, poderán poñer en coñecemento a posible situación de incumprimento das obrigas de xestión de biomasa vexetal mediante a presentación no rexistro do

Concello da correspondente instancia (Anexo IV. Documento 0), na que deberá identificarse unha única parcela obxecto do procedemento mediante polígono e parcela catastrais.

2. Unha vez presentada a instancia, o órgano instructor emitirá unha providencia mediante o correspondente modelo (Anexo IV. Documento 1) na que será solicitado un informe técnico de información previa, no que se determinará a necesidade de ordenar a execución de actuacións de xestión de biomasa vexetal, conforme á lexislación vixente.

3. Se as conclusións do informe técnico ditaminan que a parcela obxecto do procedemento incumpre efectivamente coas obrigas de xestión de biomasa vexetal, o órgano instructor procederá á incoación do procedemento de orde de execución de xestión de biomasa vexetal, mediante o correspondente modelo de resolución (Anexo IV. Documento 2).

ARTIGO 4.- Resolución do procedemento de orde de execución de xestión de biomasa vexetal

1. Tras a incoación do expediente e a emisión do informe de secretaría (conforme ó modelo do Anexo IV. Documento 3), procederase á emisión da proposta de orde de execución (Anexo IV. Documento 4), que será comunicada (segundo o modelo de comunicación do Anexo IV. Documento 5) á persoa responsable, outorgándolle un período de 10 días para presentar as alegacións, documentos ou xustificacións que estime pertinentes.

2. Transcorrido dito prazo sen que a persoa titular presente alegación algunha (tal e como debe acreditar o certificado de Secretaría -Anexo IV. Documento 6), procederase á emisión da orde de execución (Anexo IV. Documento 7), que deberá ser notificada (modelo de notificación do Anexo IV. Documento 8) de xeito íntegro nun prazo inferior a 10 días á data de emisión, conforme ó establecido no artigo 40.2 da *Lei 39/2015, de 1 de outubro, de Procedemento Administrativo Común das Administracións Públicas*.

ARTIGO 5.- Execución das actuacións

1. O prazo xeral para a execución das actuacións de xestión de biomasa vexetal é, segundo o establece o artigo 22.3 da *Lei 3/2007*, de 15 días naturais, a contar dende o día seguinte á data de recepción da notificación por parte da persoa titular.

2. Transcorrido ese prazo, os servizos técnicos municipais poderán visitar á parcela obxecto do procedemento e, mediante a redacción do correspondente informe técnico de execución, constatar o cumprimento ou incumprimento da execución ordenada.

3. Se o devandito informe técnico conclúe que as actuacións ordenadas foron executadas nos termos esixidos na orde de execución, poderá procederse ó arquivo do expediente de orde de execución de xestión de biomasa vexetal.

ARTIGO 6.- Incumprimento das obrigas

1. Se o informe técnico de execución ditamina que as actuacións de xestión de biomasa

vexetal foron executadas só parcialmente ou incumprindo parte do resolto na orde de execución, procederáse á emisión dunha nova orde de execución, nos termos establecidos no artigo 14.2 da presente Ordenanza, na que se detallarán as actuacións necesarias para o total cumprimento das obrigas de xestión de biomasa vexetal, outorgando un novo prazo para a execución das mesmas.

2. No caso de que o informe técnico de execución conclúa que as actuacións ordenadas non foron executadas, nin total nin parcialmente, actuarase do modo seguinte:

- (a) Procederáse á liquidación provisional dos custos da execución subsidiaria repercutindo na persoa responsable.
- (b) Ordenarase á execución subsidiaria das actuacións.
- (c) Porase en coñecemento ó correspondente servizo da xefatura territorial da Xunta de Galicia do incumprimento das obrigas de xestión de biomasa vexetal, aos efectos de que poida iniciarse o correspondente procedemento sancionador.

ARTIGO 7.- Notificación infrutuosa

1. De acordo co artigo 44 da *Lei 39/2015, de 1 de outubro, de Procedemento Administrativo Común das Administracións Públicas*, no caso de que a persoa responsable sexa descoñecida, non posúa domicilio de notificación coñecido, ou a notificación á mesma non se poida facer efectiva, o concello levará a cabo a notificación mediante publicación da mesma no Boletín Oficial do Estado e no Diario Oficial de Galicia.

2. No caso anterior, o cómputo do prazo para a execución das actuacións iniciarase dende o día seguinte á data de publicación da notificación no Boletín Oficial do Estado.

ARTIGO 8.- Execución subsidiaria

1. Para a liquidación provisional dos custos da execución subsidiaria empregaranse os prezos das Tarifas TRAGSA 2018 (Anexo V) correspondentes ás actuacións de xestión de biomasa vexetal ordenadas.

2. O Concello poderá optar entre a contratación do servizo de execución subsidiaria e a execución con medios municipais. Neste último caso, os custos a liquidar finalmente serán estimados polos servizos técnicos municipais.

3. Tras a execución subsidiaria das actuacións de xestión de biomasa vexetal procederáse á liquidación final, co correspondente cobramento ou devolución do saldo acreedor ou debedor resultante.

4. No caso de non ser posible á liquidación provisional ou final dos custos da execución subsidiaria, por ser a persoa responsable descoñecida, comunicarase este feito ó

correspondente servizo da xefatura territorial da Xunta de Galicia, podendo dar comezo a un procedemento de expropiación forzosa da parcela obxecto do expediente, en caso de exceder o importe a liquidar ó valor catastral da mesma.

ARTIGO 9.- Informes técnicos de xestión de biomasa vexetal

1. Os informes técnicos, tanto de información previa como de execución, que formen parte do procedemento de orde de execución de xestión de biomasa vexetal deberán estar asinados por un técnico forestal competente.

2. Os contidos mínimos destes informes técnicos, son os seguintes:

- (a) Identificación da parcela mediante referencia catastral e plano de situación.
- (b) Descrición xeral da parcela. Tipos de afección (rede secundaria, núcleo urbano, etc.) e plano de superficies afectadas. Accesos e límites.
- (c) Análise da composición específica e da estrutura (alturas e densidades) dos estratos herbáceo/arbustivo e arbóreo existentes na parcela.
- (d) Fotografías que amosen visualmente o estado da vexetación descrita.
- (e) Caracterización dos combustibles en termos de risco e comportamento do lume asociado baixo escenarios meteorolóxicos desfavorables.
- (f) Análise de posibles afeccións á xestión da biomasa vexetal
- (g) Propostas de actuación
- (h) Conclusións

TÍTULO V.- PLANTACIÓNS

ARTIGO 1.- Repoboacións forestais

1. De acordo co establecido no artigo 67 da *Lei 7/2012, de 28 de xuño, de Montes de Galicia*, non está permitido executar novas repoboacións forestais en solo urbano, de núcleo rural ou urbanizable delimitado.

2. As repoboacións forestais preexistentes á entrada en vigor da devandita *Lei 7/2012* que estean situadas en solo urbano, de núcleo rural ou urbanizable delimitado deberán ser adaptadas ao establecido no Anexo II da *Lei 7/2012*, mantendo como norma xeral unha distancia mínima de 30 metros (15 metros no caso de frondosas incluídas no Anexo II desta Ordenanza) con edificacións, vivendas illadas, depósitos de lixo, parques e instalacións industriais ou 50 metros (25 no caso de frondosas incluídas no Anexo II desta Ordenanza) con gasoleiras e outras instalacións nas que se desenvolvan actividades cualificables de perigosas, segundo a *Lei 1/1995, de 2 de xaneiro, de protección ambiental de Galicia*.

ARTIGO 2.- Especies prohibidas

Non está permitida a plantación de exemplares de especies arbóreas pirófitas, de acordo coa definición establecida no artigo 3 da presente Ordenanza (especies incluídas no Anexo I), en solo urbano, de núcleo rural ou urbanizable delimitado.

ARTIGO 3.- Distancias de plantación de árbores

1. A plantación de calquera exemplar arbóreo, de especies non incluídas no Anexo I da presente Ordenanza, en solo urbano, de núcleo rural ou urbanizable delimitado deberá cumprir coas seguintes distancias de seguridade:

- (a) 2 metros coas antas das parcelas estremeiras.
- (b) 4 metros co dominio público de vías de comunicación.
- (c) 5 metros con canles fluviais de máis de 2 m de anchura
- (d) 5 metros con liñas de tendido eléctrico (medido ata a proxección horizontal do elemento condutor incluíndo a súa desviación máxima co vento, segundo á normativa aplicable a cada caso).
- (e) 25 metros co límite exterior de gasoleiras e outras instalacións nas que se desenvolvan actividades cualificables de perigosas, segundo a *Lei 1/1995, de 2 de xaneiro, de protección ambiental de Galicia*.

2. As distancias mediranse en horizontal dende o tronco da árbore.

TÍTULO VI.- INFRACCIÓNS, SANCIONES E PROCEDEMENTO SANCIONADOR.

ARTIGO 1.- infraccións

1. O incumprimento das obrigas de xestión de biomasa vexetal establecidas tanto na presente Ordenanza como na *Lei 3/2007, de 9 de abril, de prevención e defensa contra incendios forestais de Galicia*, constitúe unha infracción, de acordo co establecido no artigo 50.2 da devandita Lei.

2. O incumprimento das prescricións establecidas nos artigos 20, 21 e 22 da presente Ordenanza constitúe unha infracción, de acordo co establecido no artigo 128 da *Lei 7/2012, de montes de Galicia*.

3. O incumprimento da obriga establecida no artigo 7 da presente Ordenanza, concernente ó réxime de autorizacións nas cortas de arborado constitúe unha infracción.

ARTIGO 2.- Cualificación das infraccións por incumprimento das obrigas de xestión de biomasa vexetal

1. Posúen a cualificación de infracción leve:

(a) A definida no artigo 23.1 da presente Ordenanza, derivada do incumprimento das obrigas de xestión de biomasa vexetal, segundo o establece o artigo 51 da *Lei 3/2007*.

2. Posúen a cualificación de infracción grave:

(a) A infracción definida no artigo 23.2 da presente Ordenanza, derivada do incumprimento das prescricións sobre plantación de árbores en núcleos poboacionais, de acordo co establecido no artigo 129 da *Lei 7/2012, de montes de Galicia*..

(b) A definida no artigo 23.3 da presente Ordenanza, derivada do incumprimento do réime de autorizacións en materia de cortas de arborado.

3. A comisión de tres infraccións leves no prazo de dous anos, constitúe, así mesmo, unha infracción grave.

ARTIGO 3.- Contías das sancións por incumprimento das obrigas de xestión de biomasa vexetal

1. As contías definidas para as sancións pola comisión de infraccións leves, segundo o establece o artigo 74 da *Lei 43/2003, de 21 de novembro, de Montes*, son de 100 a 1.000 euros.

2. As contías definidas para as sancións pola comisión de infraccións graves, segundo o establece o artigo 74 da *Lei 43/2003, de 21 de novembro, de Montes*, son de 1.001 a 100.000 euros.

3. Cando para a protección dos distintos aspectos considerados nesta Ordenanza concorran outras normas de rango superior, as infraccións sancionaranse con arranxo ás maiores contías e severas medidas establecidas.

ARTIGO 4.- Gradación das sancións

1. En cada expediente sancionador a contía da multa poderá ser graduada, atendendo ós criterios establecidos nos artigos 52 da *Lei 3/2007* e 132 da *Lei 7/2012, de montes de Galicia*.

2. Adicionalmente aos criterios citados no punto anterior, no caso de incumprimento da xestión da biomasa vexetal en solo urbano, de núcleo rural, ou urbanizable delimitado, teranse en conta os seguintes criterios complementarios:

(a) O índice de prioridade de actuación, definido no Plan de Prevención e Defensa contra Incendios forestais Municipal, que estea asignado á parcela obxecto do procedemento.

(b) A presenza na parcela obxecto do procedemento de especies arbóreas pirófitas aos efectos do artigo 3 da presente Ordenanza.

(c) A presenza na parcela obxecto do procedemento de edificacións en estado ruinoso ou de abandono.

3. No caso de incumprimento das prescricións sobre plantación de árbores en solo urbano, de núcleo rural, ou urbanizable delimitado, teranse en conta os seguintes criterios complementarios:

(a) Se os exemplares plantados son especies pirófitas, de acordo coa definición establecida no artigo 3 desta Ordenanza.

(b) Se o incumprimento concirne ás distancias mínimas con gasoleiras ou outras instalacións nas que se desenvolvan actividades cualificables de perigosas, segundo a *Lei 1/1995, de 2 de xaneiro, de protección ambiental de Galicia*.

4. No caso de incumprimento do réxime de autorizacións en materia de cortas de arborado en solo urbano, de núcleo rural, ou urbanizable delimitado, terase en conta o seguinte criterio complementario:

(a) Se os exemplares cortados pertencen a especies de frondosas, de acordo co artigo 3 da presente Ordenanza.

ARTIGO 5.- Multas coercitivas

1. A comisión de infraccións por incumprimento da xestión da biomasa vexetal e por incumprimento das prescricións sobre plantación de árbores poderá dar lugar á imposición de multas coercitivas.

2. As multas coercitivas serán reiteradas por períodos dun mes, sendo a contía de cada multa do 20% da sanción total fixada para a infracción cometida.

3. Para a exacción das sancións, en defecto de pago voluntario ou acatamento da sanción imposta, seguirase o procedemento administrativo de apremio.

ARTIGO 6.- Competencia sancionadora

1. A competencia para iniciar e instruír o procedemento sancionador por incumprimento das obrigas de xestión de biomasa vexetal nas redes secundarias de faixas, de acordo co establecido no punto quinto da *INSTRUCCIÓN 1/2018, do 26 de abril, relativa ás actuacións administrativas en materia de cumprimento das obrigas de xestión da biomasa vexetal (...)*, pertence unicamente á Xunta de Galicia.

2. A competencia para iniciar e instruír o procedemento sancionador por infraccións no interior dos núcleos de poboación, de acordo co artigo 54 da *Lei 3/2007, de 9 de abril, de prevención e defensa contra incendios forestais de Galicia*, pertence á administración local.

3. No suposto do parágrafo anterior, a competencia para resolver os procedementos sancionadores pola comisións de infraccións leves e graves pertence á persoa titular da alcaldía, mentres que no caso da comisión de infraccións moi graves pertencerá ao pleno municipal.

Disposición Transitoria

As repoboacións forestais preexistentes á entrada en vigor da presente Ordenanza que, como consecuencia da súa aplicación, atopáranse a unha distancia menor a regulada no artigo 20, disporán dun período máximo de dous anos para adaptarse á citada disposición, agás autorización expresa do órgano competente da Xunta de Galicia en materia forestal.

Disposición Derrogatoria

Quedan derogadas as disposicións municipais que contraveñan o disposto na presente Ordenanza.

Disposición derradeira

A presente Ordenanza entrará en vigor no día da súa publicación no Boletín Oficial da Provincia de Pontevedra.

ANEXO I: Especies pirófitas

Nome científico	Nome común
<i>Pinus pinaster</i>	Piñeiro galego, piñeiro do país
<i>Pinus sylvestris</i>	Piñeiro silvestre
<i>Pinus radiata</i>	Piñeiro de Monterrey
<i>Pseudotsuga menziesii</i>	Piñeiro de Oregón
<i>Acacia dealbata</i>	Mimosa
<i>Acacia melanoxylon</i>	Acacia negra
<i>Eucalyptus spp.</i>	Eucalipto
<i>Calluna vulgaris</i>	Queiruga
<i>Chamaespartum tridentatum</i>	Carqueixa
<i>Cytisus spp.</i>	Xesta
<i>Erica spp.</i>	Uz, carpaza
<i>Genista spp.</i>	Xesta, piorno
<i>Pteridium aquilinum</i>	Fento común
<i>Rubus spp.</i>	Silva
<i>Ulex europaeus</i>	Toxo

ANEXO II: Especies frondosas

Nome científico	Nome común
<i>Pinus silvestris</i>	Piñeiro silvestre
<i>Taxus baccata</i>	teixo
<i>Alnus glutinosa</i>	Ameneiro
<i>Acer pseudoplatanus</i>	Pradairo
<i>Betula sp.</i>	Bidueiro
<i>Fraxinus excelsior</i>	Freixo
<i>Fraxinus angustifolia</i>	Freixa
<i>Castanea sativa</i>	Castiñeiro
<i>Castanea x hibrida</i>	Castiñeiro híbrido
<i>Prunus avium</i>	Cerdeira
<i>Quercus robur</i>	Carballo
<i>Quercus pyrenaica</i>	Cerquiño
<i>Quercus suber</i>	Sobreira
<i>Quercus petraea</i>	Carballo albar
<i>Quercus ilex spp. ballota,</i> <i>Quercus rotundifolia</i>	Aciñeira
<i>Coryllus avellana</i>	Abeleira
<i>Fagus sylvatica</i>	Faia
<i>Ulmus glabra, Ulmus minor</i>	Umeiro
<i>Laurus nobilis</i>	Loureiro
<i>Sorbus aria</i>	Sorbeira do monte
<i>Sorbus aucuparia</i>	Capudre
<i>Juglans regia</i>	Noqueira
<i>Arbutus unedo</i>	Érbedo

**ANEXO III: Modelo de comunicación previa para cortas de arborado
en solo urbano ou de núcleo rural****Comunicación previa de corta de árbores
en solo urbano ou de núcleo rural****1. Datos do****solicitante**

Nome e apelidos/ Razón social _____ NIF/DNI/NIE _____

Nome e apelidos representante _____ NIF/DNI/NIE _____

Enderezo _____ n° _____ C.P. _____ Localidade _____ Provincia _____

Teléfono _____

2. Localización da corta

Lugar _____ Parroquia _____

Polígono Catastral _____ Parcela Catastral _____

3. Características da corta

Nome da árbore	Nº a cortar

Declaración responsable

Declara baixo a súa exclusiva responsabilidade que é certo o que manifesta e, en todo caso:

- Que as características indicadas reflicten fielmente a corta a realizar.
- Que se cumprirán os requisitos da normativa específica.
- Que non se van a realizar cortas sometidas ao deber previo de autorización.
- Que conta coas autorizacións para a ocupación do dominio público ou sectoriais que resulten necesarias.
- Que achega toda a documentación preceptiva.

Autoriza, aos efectos da normativa de protección de datos de carácter persoal, a esta administración á comprobación telemática con outras Administracións públicas de datos declarados e demais circunstancias relativas ao exercicio da actividade a desenvolver.

E comunica que executará a corta a partir do día _____ (A comunicación debe realizarse con 15 días de antelación á realización da corta) cun prazo de execución de 6 meses.

Nas Neves, a ____ de _____ de 20__

Sinatura do solicitante con nome _____ e DNI _____

ANEXO IV: Tarifas para liquidación provisional da execución subsidiaria

Código TRAGSA	Concepto	ud	Precio
F04064	<i>Roza con motodesbroz. ø basal 3-6cm, cabida c. 50%-80%, pte <50%</i>	ha	1,733.32 €
F04081	<i>Roza mecanizada cabida cubierta >50%-<=80%, pendiente 10%-20%</i>	ha	664.37 €
F05035	<i>Poda altura 3 m, recorrido >1-<=2 m, ø ramas >3cm</i>	pie	1.14 €
F06164	<i>Est.madera ø>20-<=30 ; pte<25;dramas 6-8cm dispuestas >1/3fust</i>	estére o	6.19 €
F06209	<i>Saca mec.madera pte< 30% distancia <200 m</i>	estére o	4.60 €
F06213	<i>Carga madera con grúa 101/130 CV</i>	estére o	1.19 €